

Students da duta Europa te Fascia

A Cianacei e sun Ciampac rua mile students de la Universitàdes de dut l continent per la manifestazion Snowdays de la Università Ledia de Busan



Endèna l'edizion de l'an passà di Snowdays.

Università - En sabeda ai 10 de mèrz sun Ciampac via per l di e a l'Hotel Caminetto/Hexen Club de Cianacei ge vegnarà dat alberch a passa mile students da duta Europa. L'ocajion l'è i Snowdays 2018, l maor event da d'invern endrezà dai students per i students.

Chest an la manifestazion, endrezèda dal Sports Club University jun Busan (Scub), la rua a la 15^a edizion e la sarà dai 8 ai 9 de mèrz a Andalo Paganella e ai 10 de mèrz te Fascia con garejèdes sportives e festes.

La scomenzadiva la é nasciuda del 2003 canche n centenè de students se à binà per jir coi schi sui portoes de Obereggen, da chel an l'event l'è cresciù e l'à portà foravia l nonzech de la Università Ledia de Busan che ades

la bina su per i portoes del Trentin-Sudtirol students da dut l continent: da l'Università de Frankfurt, la Bocconi de Milan, l'Università de Bologna, chela de Maastricht e ence desvaliva universitàdes svizeres. En dut sarà trentacinch università.

Tel comitat de endrez l'è ite trenta volontadives da duta la facultèdes de la Università Ledia de Busan e l'è coordinà da Elia Piovesan e Riccardo Vantini, president del Scub. L'obietif de la scomenzadiva l'è ge sporjer ai partezipanc dis de sport, divertiment e de enconter anter persones e cultures desvalives da duta Europa. Vegnarà endrezà garejèdes de schi, de lesa, ma ence snow volley, human table soccer, table boulder, slackline e n muie de auter. (vr)